



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KETIGA
MESYUARAT KETIGA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Peruntukan untuk Kolej Universiti
Tunku Abdul Rahman (KUTAR)**
- *YB. Puan Teo Nie Ching (Kulai)* (Halaman 1)
- **Pembinaan Sekolah Kebangsaan Baharu:
SK Bukit Sentosa 2**
- *YB. Puan June Leow Hsiad Hui (Hulu Selangor)* (Halaman 5)

**MALAYSIA
KAMAR KHAS
PARLIMEN KEEMPAT BELAS
PENGKAL KETIGA
MESYUARAT KETIGA**

Rabu, 16 Disember 2020

Mesyuarat dimulakan pada pukul 12.00 tengah hari

DOA

*[Timbalan Yang di-Pertua (Dato' Sri Azalina Othman Said)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

**Peruntukan untuk Kolej Universiti
Tunku Abdul Rahman (KUTAR)**

12.04 tgh.

Puan Teo Nie Ching [Kulai]: Terima kasih Tuan Yang di-Pertua. Tuan Yang di-Pertua, Kolej Universiti Tunku Abdul Rahman (KUTAR) merupakan sebuah institusi pengajian tinggi yang penting dan bersejarah. Ia diluluskan oleh Perdana Menteri Pertama, Tunku Abdul Rahman di bawah Rancangan Malaysia Kedua pada tahun 1969.

Walaupun KUTAR dilihat sebagai institusi khas untuk kaum Cina, hakikatnya, pengurusan dan kakitangan KUTAR terdiri daripada berbilang kaum, termasuklah pelajar. Pengajaran dan pembelajaran di KUTAR juga menggunakan bahasa Inggeris dan bahasa Melayu. Sejak KUTAR ditubuhkan, lebih daripada 200,000 pelajar cemerlang telah bergraduat.

Pada tahun 2019, mantan Menteri Kewangan Yang Berhormat Lim Guan Eng telah memperuntukkan RM45.5 juta kepada KUTAR. Peruntukan RM40 juta telah disalurkan kepada Tabung Amanah Pendidikan Persatuan Alumni TARCian (TAA-ETF) yang terdiri daripada golongan profesional untuk memastikan ketelusan kewangan. RM22 juta telah diagihkan untuk biasiswa dan bursari mahasiswa-mahasiswi dan RM1 juta untuk ganjaran kepada kakitangan institusi.

Dana yang digunakan telah dipaparkan secara terbuka. Selepas Perikatan Nasional mengambil alih pemerintahan, baki peruntukan sebanyak RM18 juta yang sepatutnya diguna sebagai bantuan kewangan pelajar, iaitu RM500 seorang pelajar telah ditarik balik oleh Menteri Kewangan. Tindakan ini

telah menimbulkan ketidakadilan kerana ada sesetengah pelajar telah mendapat bantuan kewangan tersebut.

Sebagai akibat, ramai pelajar KUTAR daripada keluarga B40 tidak dapat menerima bantuan kewangan semasa serangan pandemik COVID-19. Mengikuti kenyataan Menteri Pengangkutan Dr. Wee Ka Siong, RM58 juta telah diperuntukkan kepada KUTAR pada tahun 2020.

Namun begitu, yuran pengajian atau yuran perkhidmatan langsung tidak dikurangkan walaupun pembelajaran dalam talian telah dimulakan sejak bulan Mac. Soalan saya kepada Kementerian Pengajian Tinggi:

- (i) berapakah peruntukan pembangunan, peruntukan mengurus dan peruntukan lain yang telah disalurkan kepada KUTAR pada tahun 2020;
- (ii) berapakah peruntukan pembangunan dan peruntukan mengurus dan peruntukan lain, yang akan disalurkan kepada KUTAR pada tahun 2021;
- (iii) apakah cara KPT untuk memastikan peruntukan tersebut diguna pakai secara telus dan kebajikan pelajar dipelihara;
- (iv) apakah peranan wakil daripada KPT dan Kementerian Kewangan yang duduk dalam '*Board of Governors*' KUTAR dalam memastikan ketelusan kewangan KUTAR dan kebajikan pelajar dipelihara;
- (v) adakah *Board Of Trustees* (BOT) KUTAR memenuhi syarat klausa 8.2 yang berbunyi, dengan izin, '*at least 50 percent of the BOT members are third parties having no connection with the foundation or any of its founders*'; dan
- (vi) adakah KPT bersetuju bahawa sekurang-kurangnya seorang wakil pelajar perlu dimasukkan ke dalam '*Board of Governors*' (BOG) KUTAR supaya pelajar dapat menyertai dalam proses pembuat keputusan dan memastikan suara pelajar dapat diutamakan.

Sekian, terima kasih. Terima kasih Tuan Yang di-Pertua.

Timbalan Yang di-Pertua [Dato' Sri Azalina Othman Said]: Silakan Yang Berhormat Timbalan Menteri.

12.07tgh.**Timbalan Menteri Pengajian Tinggi [Dato' Mansor bin Othman]:**

Terima kasih Tuan Yang di-Pertua, terima kasih Yang Berhormat Kulai. Tuan Yang di-Pertua, sepertimana Yang Berhormat sedia maklum, Kolej Universiti Tunku Abdul Rahman (KUTAR) ditubuhkan di bawah Akta 555 (Akta Institusi Pendidikan Tinggi Swasta 1996). Kedudukan KUTAR adalah sama seperti universiti dan kolej swasta yang lain.

Kementerian Pengajian Tinggi (KPT) mengambil perhatian akan perkara yang dibangkitkan oleh Yang Berhormat Kulai berhubung dengan peruntukan yang disalurkan kepada KUTAR serta isu berkenaan dengan ketelusan pengurusan kewangan dalam "*Board of Governors*", dengan izin, KUTAR.

Menjawab kepada persoalan yang timbul, izinkan saya memperincikan secara satu persatu seperti yang berikut. Peruntukan pembangunan, peruntukan mengurus, dan peruntukan-peruntukan lain yang disalurkan kepada KUTAR.

Tuan Yang di-Pertua, kerajaan telah mengambil inisiatif untuk membantu KUTAR dengan menyalurkan peruntukan semenjak tahun 2013 dan secara kumulatifnya, KUTAR telah menerima peruntukan kerajaan bermula tahun 2013 dan sehingga tahun 2020, sebanyak RM328.2 juta atau lebih spesifik iaitu RM328,207,790 dan kesemua peruntukan tersebut telah disalurkan secara terus kepada KUTAR bagi memudahkan pihak KUTAR merancang perbelanjaan peruntukan tersebut.

Namun begitu, sepertimana yang dimaklumkan oleh Yang Berhormat sebentar tadi, pada tahun 2019, Menteri Kewangan, YB Lim Guan Eng telah menyalurkan peruntukan sebanyak RM40 juta kepada Tabung Amanah Pendidikan Persatuan Alumni TARCian (TAA-ETF) dan peruntukan tersebut tidak diterima oleh KUTAR.

■1210

Semenjak tahun 2013, kerajaan hanya menyalurkan peruntukan kepada KUTAR dan tidak pernah kepada NGO. Memandangkan KUTAR tidak menerima peruntukan tersebut, permohonan semula telah dibuat oleh KUTAR kepada kerajaan bagi membiayai perbelanjaan mengurus. Oleh yang demikian, kerajaan bersetuju untuk menyalurkan peruntukan RM40 juta yang dimohon dengan tambahan sebanyak RM18 juta iaitu jumlah yang dipulangkan semula oleh TAA-ETF kepada Kementerian Kewangan sebelum ini. Peruntukan tersebut telah pun disalurkan kepada KUTAR pada 11 Ogos 2020 yang lalu.

Manakala bagi peruntukan pembangunan pula, sebanyak RM1 juta

telah disalurkan kepada KUTAR pada tahun 2020. Peruntukan pembangunan ini adalah bertujuan untuk membiayai dua projek sambungan, iaitu Perolehan Peralatan Bagi Projek Industri 4.0 dan Pertanian 4.0 dan Analisis Data Besar (BDA) serta Perolehan Peralatan Projek Objek Rangkaian Internet (IOT) dan Pendidikan 4.0 dan Analisis Data Besar (BDA) bagi Kampus Induk Kuala Lumpur.

Pada tahun hadapan iaitu pada tahun 2021, kerajaan mempertimbangkan untuk memberikan bantuan kewangan kepada KUTAR sebanyak RM42 juta. Daripada jumlah tersebut, RM40 juta merupakan belanja mengurus, manakala RM2 juta lagi merupakan belanja pembangunan yang bertujuan untuk membiayai dua projek sambungan sebelum ini. Penyaluran peruntukan pembangunan ini dibuat pada setiap suku tahun seperti universiti awam yang lain.

KPT juga mengambil tindakan pemantauan dengan memastikan peruntukan yang disalurkan pada tahun semasa dibelanjakan oleh KUTAR berdasarkan unjuran kewangan serta Laporan Kewangan dan Fizikal Projek Pembangunan KUTAR yang dikemukakan setiap bulan kepada KPT.

Berkaitan dengan peranan wakil daripada KPT dan Kementerian Kewangan dalam "*Board of Governors*" (BOG) KUTAR, Tuan Yang di-Pertua, Perlembagaan KUTAR memperuntukkan bahawa pihak berkuasa bagi KUTAR, iaitu "*Board of Governors*" antaranya hendaklah terdiri daripada lima orang wakil KPT dan Kementerian Kewangan yang dilantik oleh Menteri Pengajian Tinggi. Berdasarkan perlembagaan, fungsi dan kuasa BOG KUTAR adalah seperti yang berikut:

- (i) mentadbir, membuat dasar dan memantau badan universiti dan boleh menggunakan semua kuasa yang diberikan kepada universiti selagi termaktub dalam perlembagaan ini atau syarat dan peraturan yang diberikan kepada pihak berkuasa atau pegawai lain universiti; dan
- (ii) tidak ada ketetapan yang diluluskan oleh BOG yang berkaitan dengan apa-apa perkara yang mempunyai kuasa senat tetapi BOG boleh menyampaikan kepada senat pendapat mengenai apa-apa perkara dalam kuasa senat untuk pertimbangan pihak senat.

Tertakluk kepada persetujuan Ketua Pendaftar terlebih dahulu di bawah Seksyen 30 Akta Institusi Pendidikan Tinggi Swasta 1996 [Akta 555], BOG turut

berhak meminda mana-mana peruntukan dalam perlembagaan. Selain itu, BOG juga mempunyai kuasa dalam membuat peraturan disiplin yang diperlukan bagi pegawai, pekerja dan pelajar universiti.

Peraturan disiplin ini hendaklah diterbitkan kepada umum. Kuasa dalam membuat peraturan bagi BOG juga meliputi perkara-perkara seperti perjalanan dan pengurusan universiti, fungsi dan tugas pegawai universiti, aktiviti dan kebajikan pelajar, memutuskan kadar yuran, pengurusan kampus cawangan, fakulti dan pengurusan bangunan-bangunan universiti.

Berkenaan dengan keahlian "*Board of Trustees*" Tuan Yang di-Pertua, menjawab kepada persoalan berhubung dengan keahlian "*Board of Trustees*" KUTAR, dimaklumkan bahawa seramai 12 orang telah dilantik sebagai BOT KUTAR. Daripada jumlah ini hanya seorang sahaja yang merupakan ahli *foundation* ataupun *founder* KUTAR sementara sebelas orang lagi bukan dalam kalangan ahli *foundation* atau *founder* KUTAR.

Ini bermakna majoriti daripada BOT merupakan pihak ketiga dan tiada kaitan dengan ahli *foundation* atau *founder* KUTAR. Perkara ini adalah selaras dengan Klausula 8.2 dalam Perlembagaan KUTAR yang berbunyi, dengan izin "*at least 50 percent of the BOT members are third parties having no connection with the foundation or any of its founders*".

Berhubung dengan cadangan bahawa sekurang-kurangnya seorang wakil pelajar yang berkecuali dilantik sebagai ahli BOG KUTAR pula, KPT berpandangan bahawa perkara berkenaan adalah di bawah bidang kuasa BOG KUTAR untuk mempertimbangkannya dan sekiranya dipersetujui, perlembagaan KUTAR perlulah dipinda sewajarnya bagi memenuhi maksud tersebut. Sekian, terima kasih Tuan Yang di-Pertua.

Pembinaan Sekolah Kebangsaan Baharu: SK Bukit Sentosa 2

12.16 tgh.

Puan June Leow Hsiad Hui [Hulu Selangor]: Terima kasih Tuan Yang di-Pertua. Bukit Sentosa merupakan kawasan perumahan, perindustrian dan perniagaan yang telah dibangunkan oleh syarikat Talam Corporation Berhad sekitar tahun 1995 di Hulu Selangor. Sehingga kini, dianggarkan jumlah penduduk sekitar 80 ribu telah mendiami kawasan ini.

Bukit Sentosa mudah di akses melalui Lebuhraya Utara-Selatan (PLUS) susur keluar 118, Bukit Beruntung. Keadaan ini menyebabkan ramai penduduk membeli rumah kediaman di Bukit Sentosa walaupun bekerja di Kuala Lumpur.

Kawasan perumahan ini menjadi pilihan golongan muda kerana harganya masih murah. Kawasan ini mempunyai satu sekolah kebangsaan iaitu SK Bukit Sentosa yang menerima jumlah murid seramai 2,652 murid daripada lapisan prasekolah dan Darjah 1 hingga Darjah 6. Sekolah ini mempunyai dua sesi persekolahan dengan jumlah bilik darjah ialah 40 buah dan mempunyai kelas sebanyak 74 kelas.

Unjuran data murid tahun 2020 menunjukkan pertambahan murid seramai 84 murid berbanding tahun 2019. Cadangan pembinaan sekolah baharu yang akan dinamakan sebagai SK Bukit Sentosa (2) bertujuan untuk memudahkan penduduk sekitar untuk menghantar anak-anak ke sekolah berdekatan. Sekolah sedia ada tidak dapat menampung keperluan pelajar akibat pertambahan penduduk di kawasan sekitar.

Antara sekolah berhampiran yang lain seperti berikut:

- (i) SK Bukit Beruntung berjumlah 1,500 murid;
- (ii) SK Bukit Beruntung 2 berjumlah 1,676 murid;
- (iii) SMK Bukit Sentosa berjumlah 2,258 pelajar; dan
- (iv) SMK Bukit Sentosa 2 berjumlah 1,748 pelajar

Enrolmen di SK Bukit Sentosa dikategorikan sebagai sekolah berkapasiti padat. Sekolah ini akan mengalami masalah kekurangan bilik darjah kerana pertambahan pelajar akan menyebabkan kesesakan dalam kelas sehingga lebih 40 orang murid dalam satu kelas. Masalah kawasan tanah sekolah yang terhad juga menyebabkan pembinaan bangunan yang terhad. Ia menyebabkan ketidakselesaan proses pengajaran dan pembelajaran (P&P).

Cadangan pembinaan SK Bukit Sentosa (2) di tanah yang telah diwartakan sebagai simpanan tapak sekolah oleh Pejabat Daerah Tanah Hulu Selangor di lot bernombor 14551 PA89613. Kos pembinaan sekolah rendah berkapasiti 36 bilik darjah dan lain-lain kemudahan dianggarkan berjumlah RM54 juta. Proses pembinaan sekolah ini dijangka mengambil masa selama 24 bulan untuk disiapkan.

Matlamat pembukaan sekolah baharu ini supaya dapat menyediakan hanya 30 murid sahaja bagi satu kelas untuk memastikan proses P&P yang lebih selesa dan berkesan. Hulu Selangor berharap, cadangan ini dapat diperhalusi dan diangkat oleh pihak kementerian untuk persetujuan bagi memastikan para pelajar di Hulu Selangor dapat menjalani proses P&P dalam persekitaran yang kondusif agar dapat memangkin kecemerlangan para pelajar. Sekian, terima kasih Tuan Yang di-Pertua.

Timbalan Yang di-Pertua [Dato' Sri Azalina Othman Said]: Silakan.

12.19 tgh.**Timbalan Menteri Pendidikan II [Tuan Muslimin bin Yahaya]:**

Bismillahi Rahmani Rahim. Assalamualaikum warahmatullahi wabarakatuh.
Salam sejahtera, selamat tengah hari. Terima kasih kepada Tuan Yang di-Pertua.

■1220

Kementerian Pendidikan Malaysia (KPM) mengucapkan terima kasih kepada Ahli Yang Berhormat Hulu Selangor atas pertanyaan berkaitan pembinaan sekolah rendah baharu di kawasan Bukit Sentosa, Hulu Selangor. Yang Berhormat, KPM sentiasa komited dalam usaha menyediakan prasarana dan kemudahan infrastruktur pendidikan kepada semua murid di seluruh negara.

Bagi tujuan ini, KPM sentiasa memantau dan mengkaji keperluan membina sekolah baharu, menaik taraf atau menyelenggara sekolah sedia ada untuk memastikan murid dapat mengikuti pembelajaran dalam keadaan selamat dan selesa.

Dalam konteks pembinaan sekolah baharu, KPM akan melaksanakan analisis keperluan secara terperinci dengan mengambil kira bilangan dan kapasiti sekolah sedia ada, kepadatan penduduk di kawasan sekitar, liputan kawasan tadahan (*catchment area*) dengan izin, serta perancangan pembangunan berdasarkan perbincangan bersama-sama pihak berkuasa tempatan (PBT) bagi sesebuah kawasan.

Untuk makluman Ahli Yang Berhormat, terdapat tiga buah sekolah rendah di kawasan sekitar Bukit Sentosa sebagaimana yang disebut oleh Yang Berhormat tadi iaitu SK Bukit Sentosa, SK Bukit Beruntung dan SK Bukit Beruntung 2. Kesemua sekolah ini telah beroperasi secara dua sesi. Jumlah keseluruhan enrolmen adalah seramai 5,665 orang murid.

Enrolmen murid sedia ada bagi kesemua sekolah berkenaan telah melebihi tahap optimum iaitu purata bilangan murid melebihi 30 orang dalam satu kelas dan tidak lagi mampu menampung pertambahan jumlah murid. Analisis yang dilaksanakan oleh KPM mendapati wujud keperluan untuk membina sekolah rendah baharu di kawasan Bukit Sentosa, Hulu Selangor. Tahniah, Yang Berhormat.

Untuk makluman Ahli Yang Berhormat, KPM telah mengenal pasti cadangan tapak bagi pembinaan sekolah baharu tersebut. Pada masa ini, status tanah bagi tapak cadangan projek ini merupakan hak milik Pesuruhjaya Tanah Persekutuan. Manakala permohonan cadangan projek pembinaan sekolah rendah baharu akan dikemukakan dalam Rancangan Malaysia Ke-12

Rolling Plan (RP) 2 Tahun 2022. Walau bagaimanapun, kelulusan projek ini adalah tertakluk kepada keutamaan dan kedudukan kewangan semasa kerajaan.

KPM berharap pembinaan sekolah rendah baharu di kawasan Bukit Sentosa itu nanti akan dapat menyelesaikan masalah kepadatan murid di sekolah rendah sekitar Bukit Sentosa dan murid dapat melaksanakan pengajaran dan pembelajaran dalam keadaan selamat dan selesa. Terima kasih Tuan Yang di-Pertua, terima kasih Yang Berhormat Hulu Selangor.

Timbalan Yang di-Pertua [Dato' Sri Azalina Othman Said]: Terima kasih. Ahli-ahli Yang Berhormat, dengan itu tamatlah sesi ucapan di bawah Usul Berkenaan Perkara Tadbir Kerajaan mengikut Peraturan Mesyuarat 17. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 12.00 tengah hari, hari Khamis, 17 Disember 2020.

[Kamar Khas ditangguhkan pada pukul 12.22 tengah hari]